



20 19 йил «05» 02

№ 08-51

«___» _____ 20__ год

**Тошкент давлат юридик университети томонидан илмий фаолият
· натижаларини тижоратлаштиришни ташкил этиш тўғрисида**

Ўзбекистон Республикаси Президентининг 2018 йил 7 майдаги “Иқтисодиёт тармоқлари ва соҳаларига инновацияларни жорий этиш механизмларини такомиллаштириш бўйича қўшимча чора-тадбирлар тўғрисида”ги ПҚ–3698-сон ва 2018 йил 14 июлдаги “Илмий ва илмий-техникавий фаолият натижаларини тижоратлаштириш самарадорлигини ошириш бўйича қўшимча чора-тадбирлар тўғрисида”ги ПҚ–3855-сон қарорлари ҳамда Ўзбекистон Республикаси Вазирлар Маҳкамасининг 2018 йил 3 декабрдаги “Илмий ва илмий-техник фаолиятнинг истиқболли ютуқларини жорий қилишнинг самарали механизмларини татбиқ этиш чора-тадбирлари тўғрисида”ги 979-сон қарорига асосан

Б У Ю Р А М А Н:

1. Тошкент давлат юридик университетининг:
илмий фаолият натижаларини тижоратлаштириш тартиби тўғрисидаги
низом 1-иловага;

илмий фаолият натижаларини тижоратлаштиришда иштирок этган
муаллиф ёки илмий жамоага бир марталик мукофот тайинлаш бўйича
комиссия таркиби 2-иловага мувофиқ тасдиқлансин.

2. Илмий-инновацион ишланмаларни тижоратлаштириш бўлими
(М.Ўразалиев):

келиб тушган буюртмалар доирасида шартномаларнинг
расмийлаштирилиши ҳамда ҳуқуқий иш ва хизматлар ўз вақтида сифатли
кўрсатилишини таъминласин;

ҳуқуқий иш ва хизматлар кўрсатишга жалб қилинган таркибий
бўлинмалар ҳамда буюртмачилар ўртасидаги ишларни мувофиқлаштириб
борсин;

университетнинг педагог ходимлари, докторантлар ҳамда мустақил изланувчиларини ҳуқуқий иш ва хизматларни кўрсатиш фаолиятига жалб қилиш чораларини кўрсин.

3. Маънавият ва маърифат маркази (Ш.Пўлотов):

ҳуқуқий иш ва хизматлар кўрсатиш бўйича корхона, муассаса ҳамда ташкилотларда тарғибот-ташвиқот ишларини ташкил этсин;

ҳуқуқий иш ва хизматлар тўғрисидаги маълумотларни оммавий ахборот воситаларида, шу жумладан университетнинг расмий веб-сайти ҳамда ижтимоий тармоқлардаги саҳифаларида эълон қилиб борилишини таъминласин.

4. Курс деканлари, Илмий тадқиқотларни мувофиқлаштириш ва илмий педагог кадрларни тайёрлаш бўлими ҳамда кафедра мудирлари:

университетнинг педагог ходимлари, докторантлар ҳамда мустақил изланувчиларини ҳуқуқий иш ва хизматлар кўрсатишидаги иштирокини;

ҳуқуқий иш ва хизматлар шартномада белгиланган муддатларда ҳамда юқори савияда кўрсатилишини таъминласин.

5. Бухгалтерия (А.Иминов) ва Молия-иқтисод бўлими (А.Рахимов):

ҳуқуқий иш ва хизматлар преysкуранти ишлаб чиқилишини ҳамда мувофиқлаштирилишини;

шартнома асосида келиб тушган пул маблағларининг белгиланган тартибда тақсимланишини;

ҳуқуқий иш ва хизматлар кўрсатишда иштирок этган муаллиф ёки илмий жамоага бир марталик мукофотни ўз вақтида тўланишини таъминласин.

6. Мазкур буйруқ бажарилишини назорат қилиш проректорлар Н.Салаев ва У.Пуллатов зиммаларига юклансин.

Адлия вазири
Ўринбосари – ректор

Е. Каньязов

Илмий фаолият натижаларини тижоратлаштириш тартиби тўғрисида НИЗОМ

1-боб. Умумий қоидалар

1. Мазкур Низом Ўзбекистон Республикаси Президентининг 2018 йил 7 майдаги “Иқтисодиёт тармоқлари ва соҳаларига инновацияларни жорий этиш механизмларини такомиллаштириш бўйича қўшимча чора-тадбирлар тўғрисида”ги ПҚ–3698-сон ва 2018 йил 14 июлдаги “Илмий ва илмий-техникавий фаолият натижаларини тижоратлаштириш самарадорлигини ошириш бўйича қўшимча чора-тадбирлар тўғрисида”ги ПҚ–3855-сон қарорлари, шунингдек Ўзбекистон Республикаси Вазирлар Маҳкамасининг 2018 йил 3 декабрдаги “Илмий ва илмий-техник фаолиятнинг истиқболли ютуқларини жорий қилишнинг самарали механизмларини татбиқ этиш чора-тадбирлари тўғрисида”ги 979-сон қарорига мувофиқ Тошкент давлат юридик университети (кейинги ўринларда университет деб юритилади) томонидан илмий фаолият натижаларини тижоратлаштириш, муаллиф ёки илмий жамоага бир марталик мукофот тўлаш тартибини белгилайди.

2. Илмий фаолият натижаларини тижоратлаштириш университет ва буюртмачилар ўртасида тузиладиган шартнома асосида амалга оширилади.

3. Илмий-инновацион ишланмаларни тижоратлаштириш бўлими илмий фаолият натижаларини тижоратлаштириш фаолияти билан боғлиқ ишларни мувофиқлаштириб боради.

2-боб. Ҳуқуқий иш ва хизмат турлари

4. Илмий фаолият натижаларини тижоратлаштириш қуйидаги ҳуқуқий иш ва хизматлар (кейинги ўринларда ҳуқуқий хизматлар деб юритилади)ни реализация қилишни назарда тутади:

ҳуқуқий тарғиботларни амалга ошириш;

ҳуқуқий маслаҳат бериш;

юридик шахслар локал ҳужжатларининг лойиҳаларини тайёрлаш;
норматив-ҳуқуқий ҳужжат лойиҳасини ишлаб чиқиш;
норматив-ҳуқуқий ҳужжатлар лойиҳасини экспертизадан ўтказиш;
қонун ҳужжатлари ва уларнинг нормалари мазмун-моҳиятини тушунтириш;

шартнома лойиҳаларини ишлаб чиқиш ва экспертизадан ўтказиш;
ҳуқуқий ва бошқа айрим ижтимоий фанларга оид дарслик, ўқув ва ўқув-услубий қўлланма, монография, ахборот-таҳлилий материал, илмий-амалий шарҳ ва рисола тайёрлаш;

ҳуқуқий ва бошқа айрим ижтимоий мавзуларда давра суҳбатлари, илмий семинарлар ва конференциялар ўтказиш;

ҳуқуқий таржима ишини бажариш;

ҳуқуқий тарғибот материалларини тайёрлаб бериш;

ҳуқуқий таълим хизматини кўрсатиш;

меҳнат қонунчилиги билан боғлиқ локал ҳужжатларни ишлаб чиқиш ва экспертизадан ўтказиш;

юридик шахс ташкил этилганда, қайта ташкил этилганда, унинг ҳуқуқий мақоми ўзгарганда ҳуқуқий қўллаб-қувватлаш;

ўқув, илмий ва бошқа босма материалларни таҳрир этиш, тақриз ва хулосалар бериш;

модуль-кредит тизимида ўқув жараёнини ташкил этиш, ўқув дастурлар бўйича амалий ёрдам кўрсатиш;

таълим жараёнида янги технологиялар асосида ўқитишни ташкил этиш бўйича маҳорат дарсларини ўтказиш;

таълим муассасаси фаолиятини тартибга солишга қаратилган низом, йўриқнома ва дастурлар лойиҳаларини ишлаб чиқиш;

ҳуқуқий соҳада ахборот коммуникацион технологияни қўллаш билан боғлиқ хизматлар кўрсатиш.

Буюртмачилар таклифига кўра университет қонун ҳужжатларида таъқиқланмаган бошқа ҳуқуқий хизматларни ҳам кўрсатиши мумкин.

3-боб. Ҳуқуқий хизматлар кўрсатиш бўйича муаллифни белгилаш ёки илмий жамоани шакллантириш

5. Ҳуқуқий хизматлар кўрсатиш учун муаллиф ва илмий жамоа университет педагог ходимлари, докторантлар ҳамда мустақил изланувчилари ва ҳамкор ташкилотлар, илмий-тадқиқот муассаса ходимлари

орасидан тажрибали, зарур билим ва малакага эга бўлган мутахассислардан тегишли равишда белгиланади ва шакллантирилади.

Ҳуқуқий хизматлар муаллиф ёки илмий жамоа томонидан кўрсатилади.

6. Шартнома бўйича ҳуқуқий хизматлар кўрсатишга муаллиф ёки илмий жамоани жалб қилиш университет ректори билан келишилган ҳолда илмий ишлар ва инновациялар бўйича проректор томонидан амалга оширилади.

7. Муаллиф ёки илмий жамоа университет ва буюртмачилар ўртасида тузилган шартномада белгиланган хизматларни кўрсатади.

4-боб. Ҳуқуқий хизматлар кўрсатган муаллиф ёки илмий жамоага бир марталик мукофот бериш

8. Ҳуқуқий хизматлар кўрсатишда иштирок этган муаллиф ёки илмий жамоага бир марталик мукофот тўланади.

9. Шартнома асосида университетнинг инновацион жамғармасига келиб тушган маблағлар ҳуқуқий хизматларнинг таннархига киритиладиган харажатлар қопланганидан сўнг қолган қолдиқ суммасининг 30 фоизи миқдорида муаллиф ёки илмий жамоага белгиланган тартибда бир марталик мукофот тарзида берилади.

10. Университет ректорининг буйруғи билан ҳуқуқий хизмат кўрсатишда иштирок этган муаллиф ёки илмий жамоага бир марталик мукофот тайинлаш бўйича камида 5 кишидан иборат таркибда комиссия (кейинги ўринларда Комиссия деб юритилади) тузилади.

Комиссия унинг аъзоларининг камида учдан икки қисми иштирок этганда ваколатли ҳисобланади.

Комиссиянинг қарори оддий кўпчилик овоз билан қабул қилинади ва мажлисда иштирок этган барча аъзолар томонидан тасдиқланадиган баённома билан расмийлаштирилади. Овозлар тенг бўлганда, Комиссия раисининг овози ҳал қилувчи ҳисобланади.

11. Комиссия ҳуқуқий хизматларни бажарилганлик фактини тасдиқловчи ҳужжатларни ўрганиб, муаллиф ёки илмий жамоага бир марталик мукофот тайинлаш тўғрисида қарор қабул қилади.

12. Бир марталик мукофотни муаллиф ёки илмий жамоа ўртасида тақсимлаш комиссия қарорига мувофиқ университет ректорининг буйруғи билан белгиланади.

5-боб. Якуний қоидалар

13. Муаллиф ёки илмий жамоа ҳукуқий хизматларнинг белгиланган муддатларда сифатли кўрсатилиши учун жавобгар бўлади.

14. Ушбу Низом талаблари бузилишида айбдор бўлган шахслар белгиланган тартибда жавобгар бўлади.

**Илмий фаолият натижаларини тижоратлаштиришда иштирок этган
муаллиф ёки илмий жамоага бир марталик мукофот тайинлаш бўйича
комиссия таркиби**

- | | | | |
|----|--------------------|---|--|
| 1. | Н.Салаев | — | Илмий ишлар ва инновациялар бўйича проректор, Комиссия раиси |
| 2. | У.Пулатов | — | Молия-иқтисод ишлари бўйича проректор |
| 3. | А.Иминов | — | Бош бухгалтер |
| 4. | А.Рахимов | — | Молия-иқтисод бўлими бошлиғи |
| 5. | Ж.Абдурахмонхўжаев | — | Илмий тадқиқотларни мувофиқлаштириш ва илмий педагог кадрларни тайёрлаш бўлими бошлиғи |
| 6. | М.Ўразалиев | — | Илмий-инновацион ишланмаларни тижоратлаштириш бўлими бошлиғи |
| 7. | Д.Камалова | — | Жиноят ҳуқуқи ва криминология кафедраси катта ўқитувчиси, Комиссия котиби |

Изоҳ: Комиссиянинг аъзолари бошқа ишга ўтган тақдирда, унинг таркибига ушбу лавозимга янгидан тайинланган шахслар киритилади.